

Isumaginninnermik Naammagittaalliuuteqartarfiup sullissinnermik ingerlatsisarnera pillugu Nassuiaat**Saqqummiussinermut allakkiaq
(Inuussutissarsiornermut Suliffeqarnermullu Naalackersuisoq)**

Isumaginninnermik Naammagittaalliuuteqartarfik (IN) ukiorpassuarni sullissinnermik ingerlatsisarnera naammaginartuusimanngilaq. Piffissami sivisuumi naammagittaalliuuteqartut qaammatit 24-t tikittarlugit Isumaginninnermik Naammagittaalliuuteqartarfiup aalajangiussissutaanik tigusaqarnissamik tungaanut utaqqisariaqartarput. Eqqorneqartunut piffissamik sivisuumik sullissivigineqartarnerat naammaginangitsuusoq Naalackersuisut erseqqissumik isumagaat. Taamaattumik sullissinerup sivissusaata annikillisinnessaa pillugu anguniagarisaq sulissutigaarput, taamaalilluni qaammatinik arfinilinnik sivissussuseqalersillugu. Anguniagaq tamanna annertoq piviusunngortinniarlugu pilersitsiniutit nutaat arlallit aallartisarniarpavut.

Isumaginninnermik Naammagittaalliuuteqartarfik aqqissuussiviuvoq kiffaanngissuseqartoq, tassaniillutik Naammagittaalliuuteqartarfik allattoqarfillu. Naammagittaalliuuteqartarfimmi ilaasortat tallimat Naalackersuisunit toqqarneqartut ukiumut pingasut-sisamariarlutik ataatsimiittarput allattoqarfimmi inatsisilerituut suliarisaannik suliassani aalajangiussisarnissaminnut. Maannakkulli Isumaginninnermik Naammagittaalliuuteqartarfiup iluserisaa ajoraluartumik suliassat naammassiniarneranut pitsaanerpaasimanngitsoq paasineqarsimavoq. Aalajangiussisoqarnissaanik 2009-mi juulip qeqqani suliassat 449-usimapput. Taakkulu Naalackersuisut amerlavallaartutut isigaat.

Piffissamut sulianik isumaginniffiusumut sivisuumut patsisissarpassuaqarpoq, pingaarnertulli patsisaasut ilagaat allattoqarfimmi inatsisilerituut akulikitsumik taarseraattarnerat. Sullissivippassuit suliffiillu maani Kalaallit Nunaanni ajornartorsiut tamanna nalunneqaaq. Naak Isumaginninnermik Naammagittaalliuuteqartarfik inatsisilerituunik atorfinnik inuttalersuillaqqikkaluarluni sulisorisat ajoraluartumik sivikingaatsiartumik suliffiminniittarsimapput. Tamanna ajornartorsiutaavoq, tamatigummi qaammatialunni suliffigisamik tamakkiisumik isumaginnissinnaalinnginnermi sungiussiniartoqqaartariaqartarmat.

Naammagittaalliuuteqartarfimmi ataatsimeeriaaseq eqaallisarniarlugu Naalackersuisut siunnersuutigaaq ilaasortat maannakkut tallimaniit pingasunut ikilisinneqassasut, kiisalu Naammagittaalliuuteqartarfimmi ataatsimiittarnerit akulillisillugit, taamaalillutik akulinnerusumik naapitalissallutik. Tamakku saniatigut Nuummi ilaasortat naapillutik ataatsimiittarnerannut akisuunut paarlaallugit oqarasuaatikkut imaluunniit videokkut siunissami ataatsimiinnerusalissallutik. Tamakku tamarmik Naammagittaalliuuteqarfimmi sulianik isumaginninnermi aqqusaartakkat eqaallisarnerannik nassataqarniartussaapput.

Allattoqarfimmi inatsisilerituut attatiinnarnissaat inuttassarsiornerilu ajornakusoorerat paasisaralugu Naalakkersuisut siunnersuutigaat allattoqarfik allatut ilusilerneqassasoq, taamaalilluni siunissami inatsisilerituut ikinnerusut atorfinitsinneqassallutik, paarlattuanilli inunnik isumaginnittartunik amerlanernik allaffimmilu assistentimik atorfinitsitsisoqassasoq. Aaqqissuussaanerup allangortinneranut isumassarsiaq Sulitilluni Ajoqusernermit Aqutsisoqarfimmit pivoq, tassani sulianik isumaginnittut amerlanersaat tassaallutik inunnik isumaginnittutut ilinniagaqarsimasut. Sulitilluni Ajoqusernermit Aqutsisoqarfimmut taamatut iluserisaq iluatsitsinermik nassataqarsimavoq, siusinnerusumut naleqqiullugu suliassarisat ikinnerullutik, aammalu sulisorisat attatiinnarniarneri iluatsitsiviulluni.

Aammattaaq Naalakkersuisut siunnersuutigaat Isumaginninnermik Naammagittaalliuuteqartarfik paasiuminarsakkatut aaqqissuussamik nittartagaqalissasoq, taamaalillutik inuit sammisanut pingaaruteqartut ataqatigiiffinni aalajangersimasuni qanoq iliuuseqarnissaminnik ilisimasassanik pissarsinissamut periarfissaqarsinnaassammata. Qularutissaanngitsumik suliassanik isumaginnittartunut ulluinnarni paasissutissanik taama ittunik pisariaqartitsisunut iluaqutaassaaq, taamaalillutik sapinngisamik pitsaanerpaamik suliaminnik isumaginnissinnaalissammata.

Tamakku sulianik isumaginninnermi piffissap sivisuup sivikilliarnissaanut aallartisaatissatut Naalakkersuisut pilersaarutigisaanni iliuusissat ilagiinnarpaat. Siunnersuutit unammillerfiup aaqqiiviginissaanut kinguneqartussatut siunnersuutitut eqqarsaatigineqarput, IN-imilli erseqqinnerusumik misissueqqissaarnerup pissusiviusuni pilersitsiniarnerit sorliit aallartisassanersut takutikkumaarpei. Naalakkersuisut pilersaarutigaat IN-imik misissueqqissaartoqassasoq, kingornatigullu iliuuserisassanik pilersaarusiortoqarluni, 2010-mi Upernaami ataatsimiinnermi Inatsisartuni ilaasortanut saqqummiunneqartussamik. Inatsisaareersunillu allanguuteqartitsinissamik isumaqassappat siunnersuutit 2010-mi Ukiakkut ataatsimiinnermi Inatsisartunut saqqummiunneqarumaarpoq.

Matumuuna nassuiaat Inatsisartunut suliareqqitassanngorlugu tunniuppara, kinguneqarluartussamillu oqaloqatigiinnissamut qilanaarpunga. Qujanaq.